

中外新遊記

汪伯訓編



上海商務印書館發行



中外新遊記

江伯訓編

(二)

商務印書館發行

中外新遊記卷二

遊中嶽嵩山記

袁希濤

中華民國八年八月。余既觀洛陽伊闕石窟。遂爲嵩嶽之遊。八月二十八日。乘汴洛鐵路車至偃師。下車微雨。車站距城五里。入城已下午二時。參觀學校三所。是晚卽宿偃師。詢赴登封狀況。須陟嶢嶺。嶺高不能通車。乃僱輿夫定明日行。

二十九日晨。雨漸止。十一時始行。出城二里許。復雨。乃避於鄉村。一時雨止。復行。又三里。乘舟渡洛河。洛水至此已與伊水合流。河面寬闊。近半里。賈船通行。張帆來往。爲北方諸水中通帆便利之水道。顧南北兩岸距離四五里之地。土質黏膩。雨後踐之。陷入半尺許。極寧滑難行之況。本年洛河漲溢。近河村落被淹者數十處。今已涸出。然數里之內。石坊古廟。自中腰以下多沒土中。知晚近以來。迭次水溢。沈澱之積土。已不止以成丈計矣。二時半至營防口。有市集。距城凡十里。又五里苦陀村。經唐廬陵王塚。高廣類小山。石人獸華表均在。又五里牧糧店。又十五里府寨。居民約五百家。有巡緝隊駐此。抵寨已六時。假宿織陽書院。天氣鬯晴。

當民國三年一月時。余自陝還京。過偃師。嵩高在望。以洛南山深多匪。不果遊。其後白狼撲滅。餘匪漸戢。

各縣多編巡緝隊戒備伏莽。偃師今有巡緝隊二百人。登封一百。地方因以安靜。惟山谷深邃處。仍時有匪類竄迹。數月前洛陽偃師間。曾捕獲二匪首。故偃師縣知事張君筱波。派巡緝隊二人爲余導護。然余詢所過地方商民。頗言尙寧靖。不致行旅有危險也。

三十日晨七時半行。十五里參駕店。居民三四百家。過此入登封界。卽登嶧嶺。盤旋曲折而上。八里至嶧嶺口。舊由轘轅關入嵩。卽在此口之東。近時關路失修。故改行此道。卽嶧嶺之頂也。氣壓六十九粉二厘。氣溫華氏表八十三度。以在府店寨所記氣壓氣溫度數爲最低點。測計高出府店寨平地一千一百二十尺。(營造尺數下同)入嶧嶺口南行偏西。沿少室(俗名御些)北麓行。七里少林寺。背山臨溪。林木森蔚。殿宇七重。規模猶在。然失修已久。門簷多凋落矣。寺僧四十餘人。舊時少林拳壇名海內。今諸拳術者祇四五人。不相傳授。近時國人知體育之重。提倡武術。漸成風氣。而千餘年來以武術標著之古寺宗風。乃反寥落衰替。幾有歇絕之歎。殊爲惜之。昔在隋唐時屢賜寺田。今唐太宗告少林寺碑尙存。而寺產祇存四頃。不敷贍養矣。觀達摩殿。(第四重大殿)有達摩面壁影石。高約二尺半。寬約尺半。白質黑章。絕似僧像。此石舊在初祖庵。今移置於此。又觀毘盧殿。(第七重殿)壁繪五百應尊及達摩法像。皆在雲水中。色相奇古。左配殿塑關壯繆像。作佛家裝束。壁繪少林先代寺僧著有武功之歷史。前殿側屋有魏齊造像石碣三。均精妙。全寺碑石一二百通。不暇細審也。遊初祖庵。囑一僧爲導。過甘露臺已圯。石柱縱橫臥地。

上陟坡而西。約二里許抵庵側。門垣盡圯。後殿半塌。前殿亦簷桷脫落。闕寂無人。殿內壁基琢石爲達摩種種事蹟。絕工緻。殿前後碑碣十餘通。與喬柯豐草並峙庭際。史詢二祖廬。距寺六七里。山壁峭峻。近罕有游者。遂止不往。仍回寺。觀所設國民學校。學生二十人。僧徒居四之三。餘則爲本寺佃戶子弟。在寺遊憩約三小時復行。八里至郭店。有市集。過此折而南出少室太室兩山間。（二峯峯頂距離十七里。山麓相距祇數里。）重巒疊嶂。映帶左右。豁人心目。少室南面諸峯。尤峭厲突兀。如塔如屏。如旂如劍。狀態奇特。漸折而東過十里鋪。繞出太室之南。望太室諸峯。東西橫互。如張屏展。聯綿二三十里。所謂華山如立。嵩山如臥。蓋確肖太室兩山之神態也。六時半至登封縣城。距太室南麓五里。恰當最高頂峻極峯之正南。市廛不甚繁盛。自少林寺至城凡二十五里。晚視登封城氣壓七十一粉六糧。氣溫七十七度。測計高出府店寨平地三百七十尺。

三十一日晨七時五十分行。乘椅轎遊石淙。縣知事呂君薰臣蒞任數月。未攬斯勝。因偕勸學所長劉君幼彥同余往游。出東門八里中嶽廟。廟制視岱衡華諸嶽尤宏偉。前門作宮城狀。凡歷五門約逾半里。始達大殿。各門及左右配殿多已凋落。大殿甫經修葺。琉璃黃瓦。重檐飛甍。一依帝制。後殿亦纔重建。丹雘煥然。亦施黃瓦。殿之左右設寢室。陳臥具。有嶽帝臥像。又後御書樓。盡圯矣。今方施工建復。紮架高七八丈。巨材聚列。正施斧削。蓋廟久毀損。有太原人吳子明者。好道家之學。居嵩有年。苦心籌募。集款數萬金。

陸續興修。於保存古蹟。要有裨益。觀魏太安二年中嶽碑。在大殿前覆以亭。碑之中幅多啜蝕。近四邊處字尚存。歷代御祭碑。在御書樓左右。所存無多。第四重門之左有巨柏。導者指爲漢柏。稽之志籍則非也。然亦千餘年物。詢漢太室石闕。尚距門外半里許。餘未及往觀。遂東行。循焦溪十五里五渡村。又十里告城鎮寨。古陽城也。寨西周公廟。有古測景臺。周公測日景以求地中。定都於洛。前三千年有此日星測驗之制。可謂世界文化先進之證。殿前有石製土圭。高五六尺。(約合周尺八尺)立於石磴之上。蓋專以測日景者。今微有傾欹之勢。殿後有臺。高約三四丈。臺上屋三間。中開方孔。孔上登磚槽。直至地爲一垂線。其北接砌石條。長五丈。寬尺有半。高三尺。號量天尺。石上刻二平行線。余以指南針測之。確爲子午線。由臺上方孔之中線。測所過子午線之日星。則夜半中星。及正午日晷。皆可測定。志稱之爲觀星臺。尚未賅其體用之全。相傳元郭守敬曾就臺觀測。是否經其修葺。已無可稽。而制作奇古。實曆象沿革史上。有重要價值者也。

入告成鎮寨。東西長三里。居民五百餘家。飯後東行。溯淙水而上。淙水一名平樂水。發源玉女臺西南流。在告成鎮南合焦溪入潁。淙水甚清。岸石倒影。饒有逸致。八里抵石淙西口。峭石無數。當溪矗峙。中闢一石門。直削如刀劈。水涓涓流出。不知其所從來。乃攀躋出石岡上。轉而東下。則異境天開。怪石林立。淙水自東流入。略如石檻。飛雪轟雷。頗聳耳目。既乃繞石環流。經無數曲折。以西出於石門。石立水中。森削參

錯。形態奇詭。如羊如獅。如屏如案。不可名狀。石與石相距不過尋丈。岸石突兀映帶。亦聯爲一氣。坐石環闕。其歎奇絕。昔唐武后曾譏羣臣於此。張昌宗撰石淙序。與狄梁公等應制諸詩。刻在右壁。今隔水可辨。其他摩崖題名亦不勝計。憩覽二時許歸。抵登封城已八時矣。

九月一日登嵩頂。晨七時半乘轎行。由中嶽廟後之黃蓋峯登山。峯頂有亭。重簷黃瓦。亦建復未久。五里宋家莊。村戶數家。沿溪傍崖。風景殊勝。過此路漸陡。仰望一嶺橫迤而南。嶺石純滑。巉峴崩剝。似堆壘攢簇而成。蓋志所謂望朝嶺者也。路出其下。繞登嶺北至周道峯。與由盧巖峯登嶽之御路合。然石路盡壞。崎嶇曲折。覓徑以行。十里青岡坪。有小廟。爲登嵩頂之半道。亭與午餐。已十一時矣。過此經陡壁。步行里許。繞出嶺上。石有鑿圓孔者數處。曰槩旗孤梁。古張旗迎輦處也。其峯名勝觀峯。又上經小鐵梁峽。石壁劈分。北瞰平遠百里以外。又上路較平。俗稱跑馬嶺。道旁有泉曰西流泉。清澈可飲。嶺盡轉而西北。爲鐵梁峽。石岡中斷。南瞰石壁。豁然分裂。直下千尺。極雄奇陡險之觀。今由岡下填築石徑以通行人。又轉而上躋。抵白玉觀。自青岡坪至此約十里。或卽古白鶴觀故址。今修小廟可借宿。乃置臥具於此。又上約三里有小廟。顏曰峻極宮。二道人守之。又上約里許。爲中峯絕頂。卽所謂峻極峯。太室最高處也。僅一碑立石壇上。今稱之爲御碑。按志稱頂稍南有唐武后封禪壇墟。故有碑自號大周。視今壇址似尙不合。碑文亦多駁泐。不能詳考矣。峯頂四眺。北見邙山洛水皆甚近。惟黃河不能確指。意爲邙山所蔽。抑或暮藹

掩之。西室少室諸峯。已作俯首遙拱狀。西南望山痕五重。連縣複疊。蓋南陽許汝諸山也。南望大熊山箕山。均在咫尺。潁水一線如帶。登封縣城如一長方棋枰。展置山麓。時已五時一刻。視氣壓六十三粉二厘。氣溫七十三度。測計高出登封城平地三千二百二十尺。登封城平地高出海面若干。未經測得密合之數。但其氣壓之標準數爲九百餘尺。則嵩嶽頂峯之高出海面之數。約四千一二百尺。

眺覽畢。回白玉觀。詢二仙洞距此約里半。乃囑道人爲導。緣崖下行。路極峭險。近洞處巉巖百尺。形勢壯偉。入洞折而左出。繞巖上涉。路絕。以木架道。斜度再上。依山砌構屋二排。憑檻下眺。幽曠絕塵。以將暮急回。攀援上躋。抵白玉觀。日已西落矣。晚煮嵩山百合爲食。是日天氣晴朗。入晚明星閃爛。夜氣凜冽。就西側屋支二木板以寢。

二日晨。氣溫低至六十六度。御棉衣。步行下山。九時過青岡坪。改由盧巖峯之登嶽御路行。過盧巖峯觀瀑布。爲昔人游記所盛稱者。始自高巖下注。水勢不甚旺。其後隨石坡層層遞降。約一二里成二三疊之瀑布。最下乃爲無數短瀑。瀑流飛灑如珠。耀日閃閃作微芒。故稱水簾。或稱珍珠瀑。嵩嶽水源不旺。僅此一瀑。乃有殊致。要足重也。又下繞坡坳而南而東。數里坡盡。下爲盧巖寺。唐盧鴻隱居處。後改爲寺。堂宇渾渥落。僧徒力耕以食。入寺少憩。復由東麓取道中嶽廟回城。視昨登山舊道。繞行多八里。恰午正十二時。

午後參觀學校二處。又出城至縣立高等小學校。舊嵩陽書院。古爲嵩陽觀。門外廣場有鉅碑巍然立。高出院屋之脊。爲唐徐浩書李林甫撰之聖德感應碑。隸法遒整。石亦完好光潤。無稍損蝕。爲唐碑所僅見。入門堂宇三重。後爲藏書樓。今皆作校舍。兩旁添建寄宿舍。計有生徒一百三十餘。登封合邑高小僅此一校。舊僅二班。今增一班。乃得此數。院有古柏三。最鉅者在中院。漢武帝時。封大將軍。蓋三代時物。今可七人圍之。樹幹分裂。或已半枯。或尚有枝葉。其次者在前院。可五人圍之。紋理紐拗。號二將軍。又次者在後院。明季燬於火。並根株不存矣。院內碑碣亦多可觀。時已近暮。乃急東趨。約三四里。觀啓母石。石在巖趾。高二丈。廣如之。蓋山巔所墮。古代神話。有禹妃塗山化石。裂石生啓之說。不足置辨。舊有刻文。今亦不能辨認。距石一里爲崇福宮。宋時宰執退位。授以祠祿。此其一也。有泉自山坡下注。舊時泛觴亭及宮觀臺榭俱圯。惟廟屋十餘楹表茲遺蹟。尙形軒敞。碑石森立庭際。天晚不及觀。急回城。

三日晨。辭別縣知事呂君。將取道西麓以歸。由嵩陽書院西北行。陟岡阜約五里。法王寺。建自漢明帝時。爲嵩山最古之巨刹。今殿宇未盡毀。古碑已無一存。一老僧已瞽。扶杖出款客。寺據嵩坳。境最幽勝。而苔封榛塞。幾絕游人。可惜也。其東是大塔院。卽古嵩麓寺。毀敗尤甚。因未入觀。繞行西麓至距城十里之會善寺。亦古名利。今漸凋落。猶有僧十餘人。爲少林之亞。寺外植柏數千株。蔚然成林。呂君就寺備午餐。餐畢。趨十里莊大道。出嶧嶺口。晚宿於府店。

嵩山二室東西並峙。少室連綿數十里。其巔寬廣有御砦之名。而石崖層疊。陡立千尺。躋登極難。其東南諸峯峭削攢簇。取徑尤爲不易。探幽之屐。罕所顧問。太室諸峰則脈絡聯貫。其最高峯頂。更出少室頂峯之上。歷代封禪禱祀。及名人遊觀。皆聚於此。故余遊嵩。對於少室諸峯之峻偉奇特。亦惟有目眺神會。而未一涉足其間。誠不免有負勝境也。

嵩嶽地質。距山麓數里以上皆花岡巖。青岡坪一帶有偉品花岡。其近山麓處多雲母片巖。間有片麻巖。礮嶺口一帶爲頁巖及泥版巖。自偃師達礮嶺五十里間。土性頗沃。農產多植棉。高地鑿井置鐵輪。垂戽斗於井中。以驟馬曳輪。汲水灌田。每畝收益可十餘緒。余偕偃師縣知事張君筱波觀桑園及農事試驗場。桑葉肥大。幾視江浙爲勝。所試種之美棉。枝幹橫出。每株結鈴二三十。少者亦十餘。成績似頗良好。本此加以推廣。他時絲棉之利不難倍徙於今日。礮嶺以南。山田較瘠。農產遜於偃師。然負土之山。十九童赤。他日導以造林。當能生利。坡坨草地。亦宜畜牧。人民樸質服從。今雖風氣不開。教育甚幼稚。然國內息爭以後。苟加整理推廣。亦非無普及之望。登封近兩年歷辦小學教員講習所。亦知所先務者也。四日晨發自府店。午刻抵偃師車站。遂附車達鄭縣。換車北旋。翌晚抵京寓。

黃山遊記

黃炎培

五月一日。微雨。自屯溪北去黃山下。可百三十里。須兩日乃達。午前八時。雇肩輿三。與夫六。挑子一。冒雨以行。十五里至東關。又五里至梅嶺。入歙縣境。又十里至西溪南。渡西溪無船。用竹筏載肩輿以過。稍歇便覆。幸無恙。又十里至潛口。又十五里至容溪宿。凡行六十五里。自潛口以上。遠山四徧。過佛子嶺。入萬山中。容溪出容成峯下。雲氣蒼鬱。又無導者。莫能指峯名也。

黃山行

一往境幽絕。唯心與構成。近山偏不見。下谷盡無聲。水共人爭道。雲封嶺作城。却餘遊屐少。卅六失峯名。

是夜宿容溪逆旅。破屋一間。牀竈藩溷。一取混合制度。其家男女老幼。處之怡然自適也。

二日雨不止。晨七時行十五里。至下舍。又十里。度山口嶺。至山口村。又十里。度石碣嶺。黃土嶺。至楊村。盡日行萬山中。借炊於蔣氏。主人號雅堂。年七十四。鬚髮如雪。村至湯口三十里。猶能一日徒步往返。自言年十九。從左文襄軍。與洪楊戰。走閩粵燕齊等省數十年。顧此前清時事。不宜復道耳。有子一。孫三。栽茶種黍爲生。小樓三間。面溪卜築。壁貼舊版歷代帝王系統圖。慨然謂吾老矣。兒輩惟苦守田園。又無力。不能使諸孫入學校。村無學。苟遠從宿儒。年非二十圓不辦。余焉能堪此。至村館夫子。已無所有。何能教人。戲以所攜小方壺齋叢鈔載清咸豐九年歙黃肇敏所爲黃山紀遊。按其地名問之。答皆不誤。問當時導

遊之村民蔣升生其人。識之否。則稱信有之。今物故矣。又言故老相傳有海馬者。能導客游。健走如飛。今無之。游客亦稀絕云。飯畢。珍重言別。爲之感不絕心也。行五里。至吳村。又十五里。至芳村。雨止日出。游興勃然。又十里。至湯口。日晡矣。羣峯列眼前。苦不能名。舍輿步行五里。至紫雲庵。天黑。叩寺門入。未幾。月大明。是日行七十里。

兩日雨行。悶坐無所事。乃閱小方壺齋黃山遊記諸篇。方知文章雖五花八門。實則遊山所經。止此一線。乃私定第一天自紫雲庵至文殊院。第二天至獅子林。第三天經雲谷過苦竹溪回湯口。以問寺僧。老僧性海年七十三。自言七歲入黃山爲僧。然文殊院以上。畏路險未之往。僧果證齋勇自請陪遊。顧其平日遊跡。亦僅至獅子林止。乃別雇一陳姓者爲導。部署定。就寢。徹夜聽泉聲若雷。寒甚。

紫雲庵。古一茅篷也。今則煥然棟宇矣。旁門猶署黃山一茅篷五字。人亦以茅篷呼之。黃山寺觀。遭洪楊劫甚苦。黃肇敏記稱紫雲庵有僧曰虛堂。以問性海。謂此吾俗家叔父也。爲洪楊擄去被害。予家芳村。實姓謝氏。言次。慘然。數十年來。游山者稀絕。性海謂年止數起耳。游者多皖南人。去年夥某醫士夫婦同游。其婦雇人負以上。實罕見。問以有無外國人來。則謂前數年有日本人嘗來。餘未見。然余聞之他人。有美國人偕日本人游。日人登蓮花峯止。美人直上天都峯。日人未能從也。性海出示黃山志。康熙間僧弘濟編。十之八爲藝文。其言三十六峯三十六源方向位置。皆不了了。志首插圖數幅。則側面風景畫。萬峯如

海而無名。愈讀愈增迷惘。然外間少傳本矣。

三日晨起。華氏表僅五十二度。視山巔降二十度矣。未攜棉衣。幸能支持。乃浴於湯泉。

湯泉與紫雲庵俱臨青龍潭。其上爲紫雲峯。庵當其腰。泉其趾焉。自湯口來。西北緣潭左行。將至庵。有橋跨潭。曰小補。過此右行。卽抵湯泉。泉深三尺。池長一丈五尺。廣半之。窪山腹。覆池之半。外蔽以亭。凡溫泉多含硫磺質。相傳此獨含朱砂質。池旁壁罅注入冷泉一縷。故溫度不高。恰適於浴。

旣浴。向文殊院進發。僧果證挑子二。臨時雇挑子一。導游者一。僧攜童子一。與余輩三人而九。皆足芒鞋。手竹杖。鼓氣首途。向庵後右偏行。不數武。倏見瀑布二道。當寺後。直自峯巔下注絕澗。僧曰。此名羅漢級瀑布之旁。有石級可拾以上。今爲瀑布矣。其水清絕。發自天都峯。庵所飲卽此。約下山當少汲以饜。緣白龍潭右上。潭卽青龍上流也。隔澗望山腰有洞。流泉千縷。曰水簾洞。沿途聞花香。絕甘美。而不見花。循石級曲折上。約三里。而慈光寺至。慈光寺明萬歷年建。實黃山最古之佛刹。當朱砂峯下。初名朱砂庵。以一庵而能致明帝后發帑賜額。實普門和尚之力。入寺卽見諸峯高聳雲表。中天都東紫雲西朱砂。而朱砂正當庵背。蓋一路爲密樹所掩。至此豁然開朗也。志載寺有古木蓮。以問僧。尋得之。樹半槁矣。旁一株完好。則年較穉。盛夏乃花。如蓮而九瓣。其果可治氣鬱。

自寺後右偏望天都朱砂兩峯間上。路漸艱仄。實非路也。兩厓間地稍陷。羣石實之。大者如牛如象。小乃

如鼠如蟻。其上林木蔽虧。時有流泉侵及足際。跬步必謹。遇大石當路。行者自其下蛇行以過。曰碰頭石。又有一石尤大。高可數丈。其長維倍。思此大小無量數石。當幾千萬年前。不知其原質何緣而結合。又何緣而析散。當破空崩陷時。不知其間有無人類。其驚動天地何若。閱幾千萬年。我乃適然與之一遇。不知更須幾千萬年。牛與象乃風化而爲鼠。鼠爲蟻。蟻爲塵埃。以揚於空際。而吾人類者。其軀殼亦已矣。不知其精神尙有遺留焉否。夫人類無日不與天然戰。而又無日不利此天然以生。其能利用此天然。而戰勝之。所謂精神非邪。今有黃山而不能遊。遊焉。憚艱阻。不能絕幽窮奇。盡天地之勝。是謂不能用。不能戰。可恥行矣哉。其毋怠毋畏。登大石。攝一影爲別。此磬礪之石。與吾新上足之芒鞋。轉戰可十里。吾芒鞋若以廬山一役。戰勝匡君。獲嘉獎。奮欲自效。以求固其名位者。故銳進不少卻。其間嘗度一峭壁。導者曰。此閣王壁也。以書考之。閣王壁當以明日過。心中無閣王壁。足下更安有閣王壁。遂上天門坎。天門坎者。兩壁夾立。僅容人過。爲自慈光寺上文殊院必經之路。遠望在天都朱砂兩峯間。抵此則朱砂已與其他諸峯落腳底。而天都依然天半。既過。路漸平。稍下復上。得一洞。鑄雲巢二字。中藏石級數十。循以上。出洞如出井。過臥龍洞。略如雲巢。經小心坡。左峭壁。右絕澗。路僅容足。得橋曰度仙。過此。便至一線天矣。洞深黑且溼。循級上。豁然開朗。自天門坎以上。壁離立。皆不甚遠。語稍高。作回聲。自雲巢以上。峯巒壁罅。奇松無數。幹上下拗折。枝皆絕平如掌。有自壁間下垂復折以上。使根反高出其頂者。雲氣繞之。飄飄有仙意。石怪

峭稱是。據書昔遊客皆嘗爲之名。奇物可名乎。彼非欲名者。亦豈因名而求肖。今莫能一一指矣。行平地數十武。遂至文殊院。

文殊院亦爲昔普門大師手創。今存屋三間。昔人有言。不至文殊院。不見黃山面。不至獅子峯。不見黃山蹤。院背玉屏峯。左天都。右蓮花。玉屏鑄此山尊三字。又天地自明四字。望之大如斗。院前大石曰文殊臺。登之。其下羣峯巒嶠。若鄉村演劇。登劇臺俯視廣場。萬頭攢聚者。凡雲之生。必於層巖絕壑。當其潏然四起。未幾而瀾滿坑谷。掀盪洶涌。一白無際。此觀劇之萬頭。時復露其一二。若孤島絕嶼。可望不可卽。所謂黃山絕景雲海是矣。惜此時夕陽在山。四無片雲。惟餘暝色蒼然。迷濛欲合而已。今日之遊。雖謂盡日與天都峯作緣可也。慈光寺遠望。與紫雲朱砂。其初無以異。爲一景。將至天門坎。頃腹並見。爲又一景。過小心坡。遊侶反顧皆大呼。蓋峯迴路轉。而又一景矣。泊上文殊臺。全身畢現。方知向摩腹過者。非天都。乃其旁較低之峯曰耕雲者是。耕雲之頂。有石如鼠。豎耳弭尾。作勢奔天都。土人謂之仙鼠跳天都。絕肖西望蓮花。則又雄秀無倫。其高幾與天都齊。自臺仰望。猶天半也。蓮花之名以其形。旁有峯如蓮含苞未放者。曰蓮蕊峯。其瓣之紋理。自頂至踵。長不可度。少時表伯南隄奚壽直先生示畫法。曰畫黃山非用披麻皴不可。爲余識黃山名之始。不意化工神筆。乃有如此大披麻皴法。惜不及令我壽直先生見也。蓮蕊之頂。有石如船。松立其中如桅。皆絕肖。遊者呼爲采蓮船。

文殊院僧德圓。一見索銀十圓。方辦餐。咄哉。殆如久餓之豺虎。饑不可耐。幸同遊者多。不則充其心安保無意外事。惟時自忖。事有進無退。第彼一人而我九。無畏。乃切責以不宜慢客。僧果證從旁爲勸。乃出茶飯。導者爲言往年上海二客來遊。德圓令人爲導。至西海門。忽大霧相失。導者流轉村落間。七日始返。而二客不歸。厥後家屬來訪。德圓不肯承。遂無知者。導者又言彼亦嘗受大創。昔年羣盜劫之。無所得。縛之樹。以香薰之。蓋山巔獨處。人跡在十里外。故無救者。是夜宿佛龕側。氣更寒。華氏表僅四十七度。

四日予德圓以三圓四角而行。玩天都蓮花。獨愛不忍去也。天仍清朗。自院西望蓮花峯進。先下深谷。曰蓮花溝。復上峭絕之壁。下臨深絕之壑。壁鑿足迹。依痕着足。一失千古。則真所謂閻王壁者至矣。經第二壁尤長。曰大閻王壁。昔之遊者。用大布。令人各執一端。障於其左。使目不見壑。乃行。亦至可笑。繞蓮花峯而西。路旁得連理松一。忽前行者大呼。於山半發見山羊。大如馬。聞呼聲。狂奔。度嶺如飛以去。問果證山有虎否。曰有之。但修行不食人。惟去年紫雲庵被攫狗一頭而已。迎面來大峯。曰鯨魚峯。導者曰。峯巔有洞。至獅子林。必過此。過此便平坦。苟上蓮花峯者。當右轉。自石坡上。往返須十里。意頗尼之。私念此機不可失。遂奮勇犯險登石坡。

石坡既盡。一徑斜上。滿地砂礫。滑甚。巨石密簪。復乘我危。爲連衡之勢以相困。遇艱絕處。吾矯健之鞋與杖。亦不得不交聲呼將伯。旋入洞。洞盡。險如前。凡經四洞。皆銳末豐腹。昔人遊記謂如從藕節中行。緣本

入瓣。信然。得一屋址。按書殆卽蓮葭庵。再上益險。一轉地忽平。而絕頂至矣。頂大可方丈。石陷處有砂。昔人名之曰香砂池。其水可浣目。使盲者明。今涸。四顧萬峯皆下拜。獨東南天都一峯巍然對峙。導者喃喃爲示諸峯名。皆土俗不與書合。據書問之。亦莫能答。其能確指者。北爲鯨魚峯。其北天海。爲今日未來之路線。西北九龍峯。西則雲門峯與西海也。其南平地匹練爲青龍潭。淵盡於湯口村。爲余輩上山之路。窺以遠鏡。歷歷如繪。於西北最遠處。見九華山。連岡蜿蜒以極於天末。至若較近之蓮蕊耕雲朱砂牛鼻諸峯。皆須俯視乃見。大地殼上。萬山噴岬而已。

登黃山蓮華峰絕頂

南條一脈接仙霞。江浙平分兩水涯。讀畫廿年想雲海。攀天今日上蓮華。巔岬俯極三千界。縹緲高承萬里槎。蓮蕊峯頂有石如船第一茲游快心事。名山大好屬吾家。

黃山山脈。在屯溪。師範學校諸君爲指示甚詳。自贛浙間之仙霞嶺。折而爲浙與皖休寧界之馬金嶺。迤西而爲扶車嶺。爲婺休間之塔嶺。爲婺之浙嶺。余自景德至屯溪。過浙嶺。卽此。再西爲婺休間之平鼻嶺。爲張公山。爲婺休兩邑與江西界之率山。折而東北。爲祁門之天馬山。爲祁休間之安息嶺。爲黟祁間之榔木嶺。復折而西北。爲黟祁間之西武嶺。爲釣魚嶺。復折而東北。爲黟與太平間之羊棧嶺。再東。遂爲黃山。北太平而南歙焉。復東北行。終於吾江蘇之寧鎮。